

В СУББОТУ СЫРНУЮ

ПАМЯТЬ СОВЕРШАЕМ ВСЕХ ПРЕПОДОБНЫХ И БОГОНОСНЫХ ОТЕЦ,
В ПОДВИЗЕ ПРОСИЯВШИХ.

В пяток вечера во светильничное по предначинательном

обычное стихословие: Ко Господу скорбети ми:

На Господи воззвах, поем стихиры подобныя, поставльше стихов 6.

Глас 8, повторяюще я:

Приидите вси вернии, * преподобных отец лики воспоем, * Антониа верховнаго, * светлаго Евфимиа, * и кождо и вся вкупе. * И сих, якоже другий рай сладости, * гражданства мысленно преходяще, красно воззовем: * сия дресе яже насади Бог наш: * сия плоды нетленныя жизни процветшая, * принесоша Христу, * питающе наша души. * К нимже возопием: * богоноснии блаженнии, молитесь спасти нас.

Радуйся Египте верный. * Радуйся Ливие преподобная. * Радуйся Фиваидо избранная. * Радуйся всякое место и граде и стране, * граждане воспитавшая Царства Небеснаго, * и сих в воздержании и болезнях возрадившая, * и желаний совершенныя мужи Богу показавшая. * Сии светила душ наших явившая: * сами чудес зарею, и дел знаменьями, * просияша мысленно во вся концы. * К тем возопием: * отцы всеблаженнии, молитесь спасти нас.

Кто изречет от земнородных чудная ваша жития, * отцы всемирнии? * Кий же язык изглаголет священныя в Дусе * подвиги и поты ваша? * Страдания добродетелей, * измождения плоти, * борения страстей, * во бдениих, в молитвах и слезах? * Вы в мире якоже ангели воистинну явистесь, * сами бесовския силы совершенно низложили, * сотворше чудная и дивная знаменья. * Темже молитесь с нами преблаженнии, * улучшить нам некончаемую радость.

Слава, глас 6:

Еже по образу соблюде невредимо, * ума вожда на страсти пагубныя постнически поставльше, * во еже по подобию яко мощно возшла есте: * мужески бо естество понудивше, * потщаетесь худшее покорити лучшему, * и плоть поработити духу. * Темже монашествующим явистесь верх, * жители пустыни, * благотекущим подвижатели, * правила добродетели известнейшая. * И ныне на небесех, * зеркалом разрешившимся всепреподобнии, * чисто зрите Святую Троицу, * молящесь непосредственно, * о верою и любовию чтущих вас.

И ныне, Богородичен глас 6.

Кто Тебе не ублажит, Пресвятая Дево; * кто ли не воспоет Твоего Пречистаго Рождества; * безлетно бо от Отца Возсиявый Сын Единородный, * Тойже от Тебе, Чистая, пройде, * неизреченно воплощся: * естеством Бог сый, * и естеством быв Человек нас ради, * не во двою лицу Разделяемый, * но во Двою Естеству * неслитно Познаваемый. * Того моли, Чистая, Всеблаженная, * помиловатися душам нашим.

Свете тихий:

Прокимен, глас 7:

Прокимен: Боже заступник мой еси Ты, * и милость Твоя предварит мя.

Стих: Изми мя от враг моих Боже, и от востающих на мя избави мя.

Пророчества Захариина чтение. [Глава 8, ст. 19 – 23.]

Сице глаголет Господь Вседержитель: пост четвертый, и пост пятый, и пост седмый, и пост десятый, будут дому Иудову в радость, и в веселие, и в праздники благи: и возвеселитесь, и истину и мир возлюбите. Сице глаголет Господь Вседержитель: еще людие мнози приидут, и живущии во градах многих. И снидутся живущии в пяти градах во един град, глаголюще: грядим помолитися лицу Господню, и взыскати лице Господа Вседержителя: иду и аз. И приидут людие мнози, и языцы мнози взыскати лица Господа Вседержителя во Иерусалиме, и умолати лице Господне. Сице глаголет Господь Вседержитель: во оны дни имется десять мужей от всех племен языческих, и имутся за ризу мужа иудеанина, глаголюще: пойдём с тобою, зане слышахом, яко Бог с вами есть.

Прокимен, глас 6:

Прокимен: Да уповаеи Израиль на Господа * от ныне и до века.

Стих: Господи не вознесеса сердце мое, ниже вознесостеса очи мои.

Сподоби Господи в вечер сей:

На стиховне самогласен, глас 2:

Очистим себе братие * от всякия скверны плоти и духа, * свещи душ наших просветим нищелюбием, * не снедающе друг друга оклеветанием: * приспе бо время, егда Жених приидет всем * воздати по делом их. * Совнидем Христу с мудрыми девами, * глас оный разбойника к Нему взывающе: * помяни нас Господи, * егда приидеши во Царствии Твоем.

Стих: К Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своея: * тако очи наши ко Господу Богу нашему, дондеже ущедрит ны.

Очистим себе братие * от всякия скверны плоти и духа, * свещи душ наших просветим нищелюбием, * не снедающе друг друга оклеветанием: * приспе бо время, егда Жених приидет всем * воздати по делом их. * Совнидем Христу с мудрыми девами, * глас оный разбойника к Нему взывающе: * помяни нас Господи, * егда приидеши во Царствии Твоем.

Стих 2: Помилуй нас Господи, помилуй нас, яко по многу исполнихомся уничижения: наипаче наполнися душа наша поношения гобзующих, * и уничижения гордых.

И мученичен: Святым мучеником молящимся о нас, * и Христа поющим, * всякая лесь преста, * и человеческий род верою спасается.

Слава, глас 8:

Монахов множества, * наставники ныне чтим отцы преподобнии: * вами бо стезею воистинну * правою ходити познахом. * Блажени есте Христу работавшии, * и вражию низложившии силу, * ангелов собеседницы, * праведных

сожителе, и святых: * с нимиже молитеся Господеви, * помиловатися душам нашим.

И ныне, Богородичен.

Подобен: О преславнаго чудесе!

Радуйся, чистоты сокровище. * **Радуйся**, невестственного света чистое жилище. * **Радуйся**, главизно спасения нашего. * **Радуйся**, апостолов проповедание. * **Радуйся**, мучеников похвало. * **Радуйся**, пророков исполнение, Всенепорочная. * **Радуйся**, подвижников и монахов украшение, * и спасение верных.

Таже, Ныне отпускаеши, и по **Отче** наш:

Тропарь, глас 4:

Боже отец наших, * **творяй** присно с нами по **Твоей** кротости, * не остави милость **Твою** от нас: * но молитвами их * в мире **управи** живот наш.

Слава, и ныне, Богородичен, глас тойже:

Еже от века утаенное, * и ангелом несведомое таинство: * **Тобою** Богородице сущым на земли явися **Бог**, * в неслитном соединении воплощаемь, * и крест волею нас ради восприим, * имже воскресив первозданнаго, * спасе от смерти души наша.

Тыяжде и на Бог Господь, и на **конец Утрени** глаголем. **Посем ектения:** Помилуй нас **Боже: и 3 поклоны великия.** **Буди** имя **Господне: трижды.** **Благословлю** **Господа: Достойно** есть: и **отпуст.** **И бывает трапеза по обычаю,** якоже и в **среду сырную** указано есть. **На Повечерии** же поем **рядовой канон мертвен гласа: во усопохранильнице.**

В СУББОТУ СЫРНУЮ НА УТРЕНИ,

По шестопсалмии, на Бог Господь:

Тропарь, глас 4:

Боже отец наших, * творяй присно с нами по Твоей кротости, * не остави милость Твою от нас: * но молитвами их * в мире управи живот наш. [Дважды.]

Слава, и ныне, Богородичен, глас тойже:

Еже от века утаенное, * и ангелом несведомое таинство: * Тобою Богородице сущым на земли явися Бог, * в неслитном соединении воплощаемь, * и крест волею нас ради восприим, * имже воскресив первозданного, * спасе от смерти души наша.

1-м стихословии, седалны, глас 8:

Подобен: Повеленное тайно:

Отеческими молниями озарившися, * яко в рай красный ныне входяще, * сладости потока насладимся, * и сих доблести ужасно смотряюще, * поревнуим добродетелем, Спасу взывающе: * молитвами их Боже, * Царствия Твоего причастники ны сотвори.

Слава, подобен:

Начальника монашествующих Павла, * согласно со Антонием мудрым, * и Евфимием воспоим вси, * с прочими отцы: * и сих умолим, яко да Христу непрестанно молятся о нас, * божественную и всесветлую совершающих память их, * в песнях славяще Спаса и Господа.

И ныне, Богородичен. Подобен:

Благодарим Тя Приснодево, * и величаем Чистая, * и покланяемся Ти, воспевающе Рождество Твое благодатная, * зовуще непрестанно: * спаси нас Дево Всемилостивая, яко Благая, * и демонскаго исхити словопрения * страшнаго в час испытания, * да не посрамимся раби Твои.

По 2-м стихословии седален, глас 4.

Подобен: Свирелей пастырских:

Антониа купно и Евфимиа, * вси со всеми прочими богоносными отцы * восхвалим песньми, * память их торжествующе: * сии бо Господеви о всем мире молятся, * да избавимся древния клятвы, * свободяшися мучения.

Слава: иный седален, глас 8.

Подобен: Повеленное:

Якоже в рай добродетелей цветущем, * богоносных постников обходяще, * вони исполняемся сладкоухания: * страданьми бо наострившися искушений, * тело воздержанием раболепно покориша духу, * ангельское на земли житие поживше. * Темже славы сподобишася.

И ныне, Богородичен:

Безплотных Твоих Христе, * и Предтечи, учеников, * пророков и мучеников, * святых всех и преподобных, * молитвами Неискусомужных * и Благия Матере

Твоя умоляемъ, * давай нам светом Твоим ходити, * и сподоби нас улучшить * Царствие Твое, * ради щедрот милости Твоя.

Таже чтем во святом Ефреме словеса о скончавшихся отцех, на даяния три.
Псалом 50.

Канон святаго обители на 6, и святых на 8. Стихословим же и Господеви поем.
Глас 8.

Песнь 1.

Ирмос: Песнь возснем людие чудному Богу нашему, * свободившему Израиля от работы, * песнь победную поюще и вопиюще: * поим Тебе единому Владыце.

Преподобнии отцы молитв Бога о нас:

Вси в песнях духовных, в подвизах просиявшия, божественныя отцы наша воспоим согласно, яже изнесе Египет, Фиваида, и Ливия, всякое место, и град, и страна.

Радуйся монахом первоначальниче, Антоние преславне, Аммуне богоносне, Нитрийская славо, Арсение ангеле, державо безмолвия, и Аммоне духоносне.

Красуйся воистинну сосуде Божий, Агафоне священнодушне: Ахилла и Аммон, цветы пустынии: Ануве и Алоние, Аммонафа и Анфиме, добродетелей светлии бисери.

Светильницы разсуждения нам, пет буди Арис днесь, и Аполлос Великий, послушания же светы Афре и Акакие, с сими и Аввакир спросияет, якоже некая денница.

Гора жительства высокаго явися Авксентий, страдалец же чистоты Авраамий Великий, с нимиже Афродисий столп воздержания явися, со Афинодором.

Сияет яко звезда на небеси в постницах Аммоний, и божественный Анина: светится же с сими и великий Антиох, и Агапит зельный, аще кто иной с сими блистает.

Песньми восхвалим священными Великаго Афанасиа, в горе Афонстей светло постившагося, светильника великаго всея вселенныя, егоже молитвами вси спасаемся.

Житии богодуховенными воистинну рай явистеся Церкви премудрии, блаженнии отцы вси по имени, о нас молитву Господеви творите непрестанно.

Приидите мучениколюбцы вернии почтим мученики честными песньми и пении, верою Христу Богу нашему, поюще и вопиюще: воспоим Тебе единому Владыце.

Слава, Троицен: Вси одинаго Естества пою, Лица самоипостасна: нерожденна Отца, Сына рождшагося, и Духа Святаго: безначальное Царство, власть, Божество едино.

Богородичен: Радуйся пресвятый храме, руно богоросное, запечатленный источниче безсмертныя струи, град Твой Владычице сохрани от различных сопостат невоеванный.

Катавасия: Песнь возслем людие чудному Богу нашему, * свободившему Израиля от работы, * песнь победную поюще и вопиюще: * поим Тебе единому Владыце.

Песнь 2.

Ирмос: Видите видите, яко Аз есмь Бог ваш, * прежде век рожденный от Отца, * и от Девы в последняя без мужа заченшийся, * и разрушивый грех праотца Адама, * яко Человеколюбец.

Благоухания ныне исполняемся яко в рай другий текуще, богонасажденных добродетелей постнических: яже в воздержаниих и слезах процветоша, различно плодоносяще жительство Богу преподобнейшии.

Великий Висарион, птичье житие поживый яко ангел, новый Иов паки, твердый Вениамин, но и Виталлий светильник, блудницы спасаяй Богу: Витимий же божественный, и славный Вавила с сими да воспоется.

Высотю жительства небо был еси, о Венедикте! Дом же премудрости, пастьрь Васиан: но и Василий некий венец прият послушания: во гробе бо живый вселився, показывает нам послушания светлость.

Песнь Геласию, сей приснопамятный царь страстей: хвала Герасиму, емуже поработа зверь: прииде бо к нему за совершение добродетели. Слава и Герману отцу, с Гаием мудрым угодником Христовым.

Давид Фессалонитская слава и похвала богоприятный Даниил да похвалится. В чудесех многих, делом же и словом, Даниил скитский: Дий же и Далмат, начальницы монахов, утверждение веры.

Звезд зари покорение, множае лучших, показа, яко два светильника сияюща нам, Дометиана же и Дометиа богомудрая: с симиже и безыменитии славно да воспоются.

Богатство неистошное верных, раку предприими Господа ради страдальчествовавших: благочестно приидите вернии, мученически сия воспоим, плодоприемлюще исцеления душам и телесем верою.

Слава, Троицен: Пресовершеннейшая Единице, Пребожественная, Триипостасная, нерожденный Отче, и Сыне Единородный, Душе от Отца исходяй, Сыном же являемый, Существо едино, и Естество: господство, Царство, спаси вся ны.

Богородичен: Едина ввела еси человечеству странное рождение, едина не подъяла еси от естества тления, безсеменное нетленно Рождество понесши: тем Тя яко Богородицу по долгу вернии Чистая прославляем.

Катавасия: Видите видите, яко Аз есмь Бог ваш, * прежде век рожденный от Отца, * и от Девы в последняя без мужа заченшийся, * и разрушивый грех праотца Адама, * яко Человеколюбец.

Песнь 3.

Ирмос: Несть свят яко Господь, * и несть праведен яко Бог наш, * Егоже поет вся тварь: * несть праведен паче Тебе Господи.

В другий рай входяще добродетелей божественных отец, сего вкусим присноподательнаго одушевленнаго наслаждения, верно восхваляюще я.

Да почтется Евфимий пресветлая звезда, денница Елладий, Ефрем богодухновенный, со Евлогием зельным, дела и чудеса облиставшии концы.

Пет буди песньми Зосима чудный, и Захариа всечестный, и Зинов, и Зоил, Исаиа Великий, и Илия славный с сими да почтется.

Фермискаго Феодора всеславнаго пою, и Енната всепетаго: с сими же и Феодула, со Феоною воспеваю. Почитаю дивнаго и Великаго Феодосиа.

Хвалимь буди Феоктист всеизрядный пастырь и высокий Фалассий, Великий Феодор нареченный Сикеот, знаменми и чудеса явлейся на земли высокий.

Звезды сияют другия, паки пресветлый Колов Иоанн, с тремя светоносными в Лествице, с вящими же иными, славно просияющий.

Почтим пеньми и песньми духовными, сошедшеся любопразднственнии, мученик всечестную и летнюю память: присно бо молятся Христу о роде нашем.

Слава, Троицен: Троице единасущная, и Пребожественная Единице, разделением соединение, и впротив Лицы Естество имущая, во едино нас совокупи хотение Твоих заповедей.

Богородичен: Скинию Тя богоделанную преднаписа Моисей, серафимами спокровенную, святых святая, прообразуя Твое Дево Рождество чистое, Христу плотию написатися.

Катавасиа: Несть свят яко Господь, * и несть праведен яко Бог наш, * Егоже поет вся тварь: * несть праведен паче Тебе Господи.

Седален, глас 4.

Подобен: Скоро предвари:

Лучи якоже солнце правды * вас Христос посла, * просвещающия землю, учителяи святии: * темже злобою помраченую душу мою, * божественными вашими молитвами, * осияйте Божественным светом * богоразумия богоблаженнии.

Иный седален, глас 8.

Подобен: Премудрости:

Антониа кроткое и чистое, * Евфимиа великое и чудное, * Павла и Арсения простое и безмолвное, * Феоктиста славу, * и прочих преподобных всех чины, * вернии прославим и совосхвалим песньми, * с нимже Евпраксию деву, * со всеми воспоим женами богомудрыми, * и согласно возопиим: * молити Христа Бога, * согрешений оставление даровати * празднующим любовию святую память вашу.

Слава, подобен:

Узы разрешше страстей, * прилепитеся любви благих, * и в славу премирную во Христе облекостесь, * от своих трудов обретше упокоение, * воздержания трудами * получивше вышнего живота. * Темже достойно радуетесь купно * с горными силами, * богоноснии отцы наши, прегрешений оставление * испросите празднующим * любовию святую память вашу.

И ныне, Богородичен. Подобен:

В тимении углебох грехов, * и несть постояния во мне, * люте потопи мя буря прегрешений моих: * но яко рождшая Слово, * единого Человеколюбца, * на мя раба Твоего призри, молюся, * избави греха и страстей душетленных, * и всякого озлобления местника, Владычице, * да пою радуяся: моли Христа Бога, * прегрешений оставление даровати ми, * Тя бо имею надежду раб Твой.

Песнь 4.

Ирмос: Из горы приосененныя Слове, * пророк, единыя Богородицы, * хотяща воплотитися, * боговидно усмотри, * и со страхом славословяше силу Твою.

Светильник мироявленный божественный Иларион, гора разумная великий Иустин: с нимиже Иеракс да почитится и Ивистион, изряднославнии, со Иосифом.

И Иеремий облиста житием: явися же и крепость велия Исхирион. С нимиже светит Карион, Коприй, Кастор, Кассиан, вкупе предобрый.

Дивлюся Каллистовым благословесием, хвалю Лаврентиева добродейния, благотворение же Логгиново восхваляю, почитаю Лотовы добродетели.

Леонтия пою глубину богословия, Максима же воспеваю пучину учений, Маркиана же удобрение, и Марка благопокориваго и богопослушнаго.

Честь добродетелей Макарий Великий, градский же, благочестия имяне. Проповедается с сими Марк зельный, с Далматом же Ефиопс Моисей.

Мартиниановы и Малховы величаю о чистоте течения же и подвиги, добродейния же Маркелла пастыреначальника, почитаю и Милла мертвецевоскресителя.

Мученицы Христовы, непрестанныя молитвы Содетелю принесите и Создателю, о мире мира, и о чтущих память вашу в песнях.

Слава, Троицен: Странно, яко едино, и три, Божество все, в триех Лицах нераздельно: Отец бо, Сын, и Дух Святой есть, покланяемая в Естестве едином.

Богородичен: Радуйся пространное Божие вместилище, радуйся, ковчеже новаго завета. Радуйся стамно, из неяже манна дадеся всем человеком пренебесная.

Катавасия: Из горы приосененныя Слове, * пророк, единыя Богородицы, * хотяща воплотитися, * боговидно усмотри, * и со страхом славословяше силу Твою.

Песнь 5:

Ирмос: Страстей мя мглы, * яко от глубокия нощи избавляяй, * утревати сподоби дух мой, * молюся, во свете дне * повелений Твоих Христе.

Едемскаго рая, приидите видим цветы присноживотныя, богопрозябленая отцев тщания, ихже есть един делатель Господь.

Нила струями словесными напаяется всяка душа мысленная, Навкратиа, Никона житиями сияет, с Нафанаилом же и Нисферон красит сию.

Ксенофонт с сынама, добродетельми блистаяся, просвещает нас, великий же Порсисий, паче же Онуфрий: Пимена же кто достойнословит от земных?

Памво и деянием и словом да ублажится достойно, яко высокий: возбраняяй же демоны Пуплий всеславный, да славится равно светлый Пиннуфрий.

Достодолжно да почитится преславный воистинну Пафнутий: Пиор, Патермуфий, Павл препростый, Питирун великий и отцев изящный.

Светло да похвалится светило светил Пахомий: Паламон сострадалец, божественный Петроний, Пасарион с ними, божественными да воспоется песньми.

Слава, Троицен: **И**постасьми три, аще и Естеством едино Божество есть, в Няже крестихомся, и Имже веруем, Отец, Слово, и Дух соестественный.

Богородичен: **С**ловом Слово паче слова рождающая Пречистая, Того молящи не престай молимся, от бед присно избавитися стаду Твоему.

Катавасия: **С**трастей мя мглы, * яко от глубокия ноци избавляяй, * утреневати сподоби дух мой, * молюся, во свете дне * повелений Твоих Христе.

Песнь 6.

Ирмос: **С**одержима мя приими **Ч**еловеколюбче, * грехи многими, * и припадающа щедротам Твоим, * яко пророка Господи, * и спаси мя.

Дивнии всечестнии отцы наши, ихже божественная страдания, ихже борения, ихже исцеления: кто бо паче сих показа чудес крепост?

Равула дивный, и Руф вкупе, и Сисой купно равноангельный да восхвалится, с нимиже божественный Ерид, и Силуан.

Небо четверосветильное явися на земли, дважды двое сие Симеонское единоимение, иже на столпах трие суть, и един юродивый.

Посреде звезд яко солнце, имже бе начальник освященный Савва облиста, с нимже озаряет и Серапион деяньми с Силваном.

Сармат и Тимофей, Тифой купно со Иперехием, и Фармуфий, Фока, Харитон, Херимон, Псой да поется, и Ор премудрый.

Святое и славное отец множество, помянутое и безыменитое, избави от бед, любовию памяти совершающих вапа.

Слава, Троицен: **Т**я Троице пребезначальная, и Божественная Единице, света и светы пою, живота и животы: Ума, Слова, Духа же Святаго, и Святая, единого Бога.

Богородичен: **И**з корене прозябе твоего цвет жизни, Иессее прадеде възграй, спасааяй мир, от Чистыя Отроковицы Христос Бог.

Катавасия: **С**одержима мя приими **Ч**еловеколюбче, * грехи многими, * и припадающа щедротам Твоим, * яко пророка Господи, * и спаси мя.

Подобен: Яко начатки:

Яко благочестия проповедники, * и нечестия обуздатели богоносных собор уяснил еси, * подсолнечную осиявающая: в мире совершенном тех молитвами, * Тебе славящая и величающая сохрани, * поющая Ти Господи: аллилуиа.

Икос: На красная жития воззрех помышленьми зря бываемая, и измерив тех болезни, жизнь человеков окаях: вас же единех ублажих добрую часть избравших, еже желати Христа, и бывати с Ним, и пети присно с пророком Давидом: аллилуиа.

Синаксарь.

Стих: Душам праведным, ихже присно память пребывает,

Стих: Жертвы покаяния приношу словеса.

В сий день память совершаем всех в пощении просиявших святых, мужей же и жен: помалу бо предводительными нас праздники, богоноснии отцы наставивше, и готовы предустроивше в поприще, и пищи и сытости отведше, и будущего суда страхом нас наказавше: сыроястною же седмицею яко должно предпочистивше, приятно и два пощения положиша посреде, да по малу нас к нему возбудят. Се и преподобно вся пожившия, и инако, болезнями многими и труды, мужы же вкупе и жены, посреде предпоставиша: яко да памятию тех и борении, сильнейша нас сотворят к поприщу, имущих оных житие, образ некий и путь. И еже от оных пособие и помощь приемлюще, к духовным подвигом влечемся, помышляюще, яко и тии тогожде нам естества общишася. Якоже бо воеводы воинством ополченным, и уже по чином стоящим, словесы и образы и древних мужей поминании, изрядно воевавших и храбровавших своя вои обошряют, и отсюда они укрепляеми, победы надеждо вседушно ополчаются. Тако и ныне богоноснии отцы мудре содевают: мужеский бо пол и женский, преподобне пожившими, к духовным подвигом укрепльше, сие к постному предводят поприщу, яко да к первообразному, незлобивому оных мы взирающе житию, многовидныя и различныя делаем добродетели, якоже комуждо сила есть. Предводительне убо любовь, и еже со умом бываемое опаяние безчестных дел и деяний. И пост сей, не снедение убо точию, но и языка, и ярости, и очию, и просто рещи, всякаго зла праздность и отчуждение. Тоя ради вины святии отцы настоящую святых всех память зде учиниша, яже постом, и иными благими делы Богу угождшия приведше, поуцающе нас образом сих к добродетелей поприщу, и доблественне на страсти и на демоны вооружитися, и некий образ подлагающе: яко аще и мы равное им тщание предложим, ничтоже претыкание будет содеяти, елика и они содеяша, и техже сподобитися честей: тогожде бо нам и сии общишася естества. О сыроястней же глаголют нецыи: царю Ираклию сию вчинити, мясоястну суцу прежде: на Хоздроа бо и персы шесть лет воевав, обещася Богу, аще на оных укрепится, сию предложить, и посреде поста и пищи уставити, еже и сотвори. Аз же мню, негли и сему ключившуся, святыми отцы умышлену быти и сию предпочищения ради некоего, яко да от мяс и многоядения, абие в крайнее неснедение ведоми не тужим, и инако, телесным обычаем вредимся: но тихо и помалу мастящих, и сладящих отстояще, якоже кони некрепкоузднии отятою снедию, и броду поста восприимем. Яко бо о души

притчами сотвориша, такожде и о телеси ухитриша, яже к посту претыкания помалу отсекающе. Преподобных Твоих всех молитвами, Христе Боже наш, помилуй нас, аминь.

Песнь 7.

Ирмос: Отроки оросивый в пещи, * и Деву сохранивый, * рождшую Тя по рождестве, * благословен еси Боже отец наших.

Приидите принесем песни по долгу, женам преподобно пожившим и равноангельно, ихже молитвами воззовем: Боже, спаси вся ны.

Христоносица Вриена, с божественною Феврониею да почитится, и Фомаидою и Иериею, и Платонида же да поется, с нимиже и Мелания верно.

Ангеломудренным хвала Евпраксиам, со двема Феодорами и Анастасиами всебогатыми, пение и слава непрестанная, чудно послужившим Богу.

Египтяныня Мариа свет в мире, и Марин нарекшаяся, звезда явися вселенней, Евфросина солнце добродетельми облистывающая.

Огневленная Феодула в житии, и озаряет в пощении Феодотиа и Иулитта, и спросияет деяньми Исидора пребогатая.

Небомудренная Марина ныне да почитится, с великою Матроною, Синклитика же и Сарра, со Иустиною, песньми яко мудрии да восхваляются.

Пелагиа, ангел Господень, Таисиа, светильник покаяния, да воспоется, и аще кая другая просия от жен в пощении.

Слава, Троицен: С Сыном Отцу покланяемся, и Духу Святому, единомудренно славословяще, верно вопием: слава Тебе Троице Единице, Боже наш.

Богородичен: Богородице Дево, рождающая мира Спаса и Владыку благословенная, Того моли всегда ущедрити души наша.

Катавасиа: Отроки оросивый в пещи, * и Деву сохранивый, * рождшую Тя по рождестве, * благословен еси Боже отец наших.

Песнь 8.

Ирмос На горе святей прославльшася, * и в купине огнем Приснодевы * Моисеови тайну явльшаго, * Господа пойте, * и превозносите во вся веки.

Пастыри и мудрыя учителя, святители Христовы Церкви, с преподобными вси воспоем, Господа поюще, и превозносяще во вся веки.

По долгу Василий Великий, и с ним многострадальный воистинну да поется Афанасий песньми, с Григорием в богословии начальствующим всеми.

Иоанна златогаголивая уста, с Кириллами богомудрыми столпами прославим: тако же и Исихиа другаго богослова, с боговещанным и божественным Мелетием.

Григорию слава Нисскому, со двема чудотворцема отцема: и премудрый божественный Елифаный, со Амфилохием светлым светильником, да поется во веки.

Митрофана священников славу, с Нектарием, Аттиком, Геннадием, с нимиже и Анатолиа поим, животныя светильники, купно со Евсевием и Проклом премудрыми.

Николаа священнопроповедника, Софрониа воистинну медоязычнаго со Евлавием пою, и Диодоха, купно со Евстафием и Увеналием отцеверховными.

Благословим Отца, и Сына, и Святаго Духа, Господа.

Троичен: Яко Единицу Существом Тя пою, яко Троицу Лицы Тя почитаю, Отче, Сыне и Душе Пресвятый: безначальную державу Твоего Царствия славаю во веки.

Богородичен: Ты гора Божия явилася еси Богородице, в Нюже Христос вселився, божественны храмы содела поюция: Господа пойте, и превозносите во вся веки.

Хвалим, благословим, покланяемся Господеви:

Катавасиа: На горе святей прославльшася, * и в купине огнем Приснодевы * Моисеови тайну явьшаго, * Господа пойте, * и превозносите во вся веки.

И стихословится, Честнейшую.

Песнь 9.

Ирмос: Проявленное на горе законоположнику * во огни и купине, * Рождество Приснодевы, * в наше верных спасение, * песнями немолчными величаем.

Кто дерзновение изречет Амвросиево? Иерофееву же како премудрость изглаголет, и Александров богомудрых отец о вере твердость?

Федим божественный, Спиридон богоносный, со Антипатром, Памвом, Палладием и Ноном, Иеронимом и Германом всечестным, яко богосветильницы да воспойются.

Многий в божественных Дионисий да почтится, яко небесных таинник, многострадальный Клим, Флавиан же, и Павла великий, исповедания первопроповедницы.

Михаил Синадский да поется с Тарасием, Никифор паки с Феодором зело, и Феофан священноименный воистинну, защитницы икон Христовых.

Петр и Игнатий воистинну богоносцы, яко Христовы апостоли, и священнострадальцы суще, да воспойются купно с Поликарпом, и Киприаном христомученикома.

Преподобнии отцы, и священноначальницы Господни, со священномученики и женами святыми, именованныи и не именованныи вси, молитесь спастиися душам нашим.

Слава, Троичен: Едине в Троице Боже, слава Тебе непрестанно: аще бо и Бог Кийждо, но един Естеством еси, Отец, Сын и Дух, трисветлыми свойствы.

Богородичен: Купину горящую огнем и неопалимую, предзряше древле Моисей на Синайстей горе, Богоприятное Твое чрево, Дево, подъемлющее нетленный огонь.

Катавасиа: Проявленное на горе законоположнику * во огни и купине, * Рождество Приснодевы, * в наше верных спасение, * песнями немолчными величаем.

Ексапостиларий.

Подобен: Жены услышите:

Мира отвергнушиися, и крест взявшии, множество преподобных отец, с лики мученик, иерарх собрание, и жен сочинение, нас возвеселите, еже воспети достойно вашу всесветлую память.

Слава, и ныне:

Подобен: Со ученики взыдем:

В постничестве просиявшия богоносныя отцы, и священноначальники, купно же от жен преподобных, и священномучеников лики, в песнях светло восхвалим: яко да освятимся, и молениями сих, и молитвами Богородицы, удобно совершим течение поста.

На хвалитех поставим стихи 4, и поем стихиры, глас 8.

Подобен: Во Едеме рай:

Отцев вси множество * преподобно постничествовавшее, * в песнях возвеличим вернии, * иерархов же Христовых восхвалим песньми, * богомудренно единодушно братие: * в воздержании бо пожиша и в посте чистом, * и Христово нам Евангелие изъясниша. * С нимиже воспоим жены богоносныя и светлыя, * жительству их боголепно ревнующе в души: * да обрящем тамо согрешений прощение.

В постничестве просиявшия светло, * преподобно же пожившия, * похвалим преславно братие, * яко жительствовавшия добре * и к жизни вечной благочестно преселившияся в радости: * ко упокоению же негиблемому, и блаженному, * тамо добродетелию и честностию право потекшия, * се достойно почтим, * яко да получим милость от Бога их молением, * и вечныя славы и радости: * и избавимся тамо неумолимых мучений.

Иерархов всех лик, * праведных собрание, * постников же и преподобных жен, * поживших благочестно, * умоли благодатию, * молите единого Благаго, * и всещедрого Господа, * ущедрити и нас: * да и тамошняго осуждения избавимся * выну молитвами вашими мудрии, * и будущаго восприятия насладимся, * непрестанно во веки веков веселящися и мы, * похвальную песнь непрестанно * Жизнодавцу зывающе.

Боголепное торжество вернии, * воспоем днесь в памяти святых обильно, * иерархов, и постников, * и священномучеников, и преподобных жен, * и благочестивых: * тленная бо и привременная истинно * презреша и аки паучину, * и аки уметы сия вмениша, * да приобрящут Христа, и Царствие Его, * и Божественная оная, * яже око не виде, * ниже ухо когда слыша. * Ихже молитвами Боже, * избави тления души наша.

Слава, самогласен, глас 6:

Преподобнии отцы, * во всю землю изыде вещание исправлений ваших. * Темже на небесех обретосте * мзду трудов ваших: * демонов разрушивше полчища, * ангелов постигосте чины: * ихже житию непорочно поревновавшие, * дерзновение имуще ко Господу, * мир испросите душам нашим.

И ныне, Богородичен:

Богородице, Ты еси Лоза Истинная, * Возрастившая нам Плод Живота, *
Тебе молимся, молися Владычице, * со святыми Апостолами, * помилуй души
наша.

Славословие великое. И отпуст.

НА ЛИТУРГИИ

Изобразительная. Блаженна от канона песнь 3, и 6. На 6.

В другой рай входяще добродетелей божественных отец, сего вкусим присноподательнаго одушевленнаго наслаждения, верно восхваляюще я.

Да почтется Евфимий пресветлая звезда, денница Елладий, Ефрем богодухновенный, со Евлогием зельным, дела и чудеса облиставшии концы.

Пет буди песньми Зосима чудный, и Захариа всечестный, и Зинов, и Зоил, Исаиа Великий, и Илия славный с сими да почтется.

Равула дивный, и Руф вкупе, и Сисой купно равноангельный да восхвалится, с нимижже божественный Ерид, и Силуан.

Слава: Небо четверосветильное явися на земли, дважды двое сие Симеонское единоимение, иже на столпех трие суть, и един юродивый.

И ныне: Посреде звезд яко солнце, имже бе начальник освященный Савва облиста, с нимже озаряет и Серапион деяньми с Силваном.

Тропарь, глас 4:

Боже отец наших, * творяй присно с нами по Твоей кротости, * не остави милость Твою от нас: * но молитвами их * в мире управи живот наш.

Кондак, глас 8.

Яко благочестия проповедники, * и нечестия обуздатели богоносных собор уяснил еси, * подсолнечную осиявающия: в мире совершенном тех молитвами, * Тебе славящия и величающия сохрани, * поющия Ти Господи: аллилуиа.

Прокимен Апостола, глас 4:

Прокимен: Восхвалятся преподобнии во славе, * и возрадуются на ложах своих.

Стих: Возношения Божия в гортани их:

Апостол дне, к Римляном, зачало 115. [Рим. 14, 19 – 26.]

Братие, мир возлюбим и яже к созданию друг ко другу. Не брашна ради разоряй дело Божие. Вся бо чиста, но зло человеку претыканием ядущему. Добро не ясти мяс, ниже пити вина, ни о немже брат твой претыкается или соблазняется, или изнемогает. Ты веру имаши? О себе сам имей пред Богом. Блажен не осуждаяй себе, о немже искушается. А сомняяйся, аще яст, осуждается, зане не от веры: всяко же, еже не от веры, грех есть. Могущему же вас утвердити по благовествованию моему и проповеданию Иисус Христову, по откровению тайны, леты вечными умолчанныя. Явльшиися же ныне, писании пророческими, по повелению вечнаго Бога, в послушание веры во всех языцех познавшиися, Единому Премудрому Богу, Иисусом Христом, Емуже слава во веки. Аминь.

Другий преподобных, к Галатом, зачало 213. [Гал. 5, 22 – 6, 2.]

Братие, плод духовный есть любви, радость, мир, долготерпение, благость, милосердие, вера, кротость, воздержание: на таковых несть закона. А иже Христовы суть, плоть распяща со страстьми и похотьми. Аще живем духом, духом и да ходим. Не бываем тщеславни, друг друга раздражающе, друг другу завидяще. Братие, аще и впадет человек в некое прегрешение, вы духовнии исправляйте

таковаго духом кротости: блудый себе, да не и ты искушен будеши. Друг друга тяготы носите, и тако исполните закон Христов.

Аллилуиа, глас 2.

Стих: Насаждени в дому Господни:

Стих: Веселитесь о Господе, и радуйтесь праведнии:

Евангелие от Матфея, зачало 16. [Мф. 6, 1 – 13.]

Рече Господь: немлите милостыни вашае не творити пред человеки, да видими будете ими, аще ли же ни, мзды не имате от Отца вашего, Иже есть на небесех. Егда убо твориши милостыню, не воструби пред собою, якоже лицемери творят в сонмищих и в стогнах, яко да прославятся от человек. Аминь глаголю вам, восприемлют мзду свою. Тебе же творящу милостыню, да не увесь шуйца твоя, что творит десница твоя, яко да будет милостыня твоя в тайне, и Отец твой, видяй в тайне, той воздаст тебе яве. И егда молишися, не буди якоже лицемери, яко любят в сонмищих и в стогнах путей стояще молитися, яко да явятся человеком. Аминь глаголю вам, яко восприемлют мзду свою. Ты же, егда молишися, вниди в клеть твою, и затворив двери твоя, помолися Отцу твоему, Иже в тайне, и Отец твой, видяй в тайне, воздаст тебе яве. Молящися же не лишше глаголите, якоже язычницы: мнят бо, яко во многоглаголании своем услышани будут. Не подобитеся убо им, весть бо Отец ваш, ихже требуете, прежде прошения вашего. Сие убо молитесь вы: Отче наш, иже еси на небесех, да святится имя Твое, да приидет Царствие Твое, да будет воля Твоя, яко на небеси, и на земли. Хлеб наш насущный даждь нам днесь, и остави нам долги наша, яко и мы оставляем должником нашим. И не введи нас в напасть, но избави нас от лукаваго, яко Твое есть Царствие и сила и слава во веки. Аминь.

И преподобных, зачало 43. [Мф. 11, 27 – 30.]

Рече Господь Своим учеником: вся Мне предана суть Отцем Моим, и никтоже знает Сына, токмо Отец, ни Отца кто знает, токмо Сын, и емуже аще волит Сын открыти. Приидите ко Мне вси труждающиися и обремененнии, и Аз упокою вы. Возмите иго Мое на себе, и научитесь от Мене, яко кроток есмь и смирен сердцем, и обрящете покой душам вашим. Иго бо Мое благо, и бремя Мое легко есть.

Киноник: Радуйтесь: Аллилуиа, [трижды].